

## Mo Vilaz

Enn zour lor enn zil, lor lakot, ti ena enn zoli ti lakaz kreol avek so twa an tol ek so ti teras kot tiena enn balanswar. Tou dimounn ti pe arete pou admir so striktir an dibwa ek an tol ek ousi so lakour kan zot ti pe pase. Bann touris ti pe mem arete pou tir foto telma zot ti emerveye par otantisite sa ti lakaz-la kot bien souvan dan dimans ti pe santi enn bon parfin bouyon pwason. Se la ki Pierrette ti reste.

Pierrette ti enn tipti tifi ki kontan zwe ek lir. Si li pa pe kas badamie, li ti pe mont bisiklet dan lakour e ena kou li ti lor so balanswar lor teras pe lir so ti liv kan li fini get ti komik. Li pa ti ena boukou kamarad parski li ti viv inpe dan so lemond. Enn lemond kot tou seki otour li ti mazik.

- *To tro lir twa ! Hahaha, mazik existe zis dan liv ouswa ti komik sa.*

Waren, so meyer kamarad depi lanfans e li ti kontan takinn li.

- *Ey les mwa trankil.*

Kan sa de la zwenn, zis samem pou tande la.

Pierrette pou boude dan so kwin. Apre selma so figir pou vinn tipti kan inn ariv ler pou Waren al kot li.

- *To pe ale tou? Kan to pou revinn zwe la?*

Sa de la ti de per las kole depi zot tipti mem si zot toulede ti bien diferan. Zot sel pwin komin : zot ti kirye.

Enn zour, Pierette ti lor teras, lor so balanswar pe lir enn liv. Li pa ti pe kapav dekol so lizie depi bann paz-la telma zistwar-la ti interesan. Enn kou li tann enn tapaz dan lakour e li trouv bisiklet Waren inn rant dan enn fouzer.

- *Ki to pe fer ? Mami trouv sa-la, nou pou gagn kri...*
- *Mo... Mo... Atann...Mo... repran... mo... souf...*

Waren ti pe paret abriti. L'expresion lors so figir ti fize. Akote li ti ena so lisien Kiwi ki ti pe sarye enn gro sakos ant so ledan. Pierrette pa ti pe konpran me li pa ti tro etone. Kiwi ti enn lisien ki sarye tou zafer e li ti pe mem manz petar kan zot ti pe sone.

Kouma li resi kapav rekoze, Warren pran sa sakos la avek Kiwi e degaze ris lame Pierrette pou amenn li andan.

Li dir li :

- *Mo ti amenn Kiwi promne anba pon Lavil nwar e get ki li'nn trouve dan ros parti dan bor delo.*

Li ouver sa ti sak-la ki ti plin ar labou e li donn Pierrette enn lakle an or. Kan li sakouy ti sak-la, enn bout papie tonbe. Lor-la ti ena enn mesaz misterye, ki paret bien vie, preske ilizib: Dan kwin legliz, dan enn ti lakaz, anba dan lakav, se lamem ki zot pou trouv mo leker.

Pierrette pa le krwar so lizie. Zot get zot kamarad e zot koz dousman pou mama ek papa Pierrette pa tann zot.

Dan latet sa tifi-la , enn ta limaz koumans defile. Lavantir, pa seki dan liv me an vre, ti pe tap so laport.

Waren ek li fer sanblan zot pe zwe anba pie badamie e zot koumans fer enn plan. Zot pran enn baton pou desinn dan later pou gete kouma pou rant dan lakav. Personn pa ti pe rant laba parski ti pe fer bien nwar e apart pou vinn kit bann boutey an ver ki nepli servi, personn pa ti pe met lipie laba.

Apre enn ti moman, vremem zot ransanble zot kouraz ek zot desann dan sa lakav-la, sa lakle an or la dan lame Pierrette. Kouma zot rant andan ek depas bann boutey antase, li santi enn saler ki pe koumans bril so lame. Lakle ti pe briy de pli an pli for, li ras dan so lame e koumans flote koumadir li pe rod montre zot semin. Bann zanfana-la zot lizie ouver gran ek Pierrette pa mem gagn letan gete si so lame finn gagn dimal ou pa. Zot lizie ti ranpli ar melanz sirpriz ek kiryoze.

3 4 pa apre, lakle arete e li koumans briy for net ; sa lalimyer dore-la ti pe kas zot lizie koumansman me dousman dousman so lintansite finn diminie ziska ki zot li zis ase for

pou trouv seki ena dan lakav-la. Zot get partou e zot lizie bat lor enn vie revey lor enn poto dibwa. Revey-la so zegwi ti pe tournn a lanver bien dousman e la zot tann lavwa enn vie matant :

- *Tik tak... Bann zanfán. Mersi pou zot prezans. Si zot get dan sa revey-la zot pou trouv mo leker.*

Zis dan sa moman-la, enn lalimyer sorti dan zegwi revey-la e rant dan lizie Pierrette ek Warren koumans ranpli ar souvenir lepase vilaz Mahebourg. Zot trouv bann peser, bann vie lakaz lontan, tou bann vie batiman e zot trouv ousi lakaz kot Pierrette reste e tou bann fami ki finn res la zenerasion apre zenerasion. Seki zot resanti dan sa moman-la inexplikab : zot finn remont dan letan.

Pierrette dir :

- *Wow. Mersi...Kouma ou apele ?*

Lavwa-la reponn ek enn sourir dan so lavwa :

- *Mwa se...*
- *Ey Kiwi to pe fer ?!*

Pierrette santi enn labav lor so figir e li leve brit. Waren ek li finn gagn somey anba lavarang e Kiwi ti pe pas so lalang lor zot pou sey lev zot. Fode mama Waren finn vinn sers li pou al lakaz aköz pre pou fer nwar pou ki li trouv Kiwi pe lis bann zanfán pou zot leve e zwe ar li. Liv zistwar Pierette ti telma interesan ki li ek Waren finn rant ladan net. Literalman.

Ziska zot vinn gran, zame zot finn rakont kikenn ki zot finn viv sa zour-la parski pou zot se pa enn rev ki zot finn fer. Pierrette ek Waren sir ki se lavwa Vilaz Mahebourg limem ki finn koz ar zot. Li finn montre zot so leker pou ki zame li efase dan seki pou zot mem zot nepli dan Mahebourg.

Vremem, 27 an apre, zot ankor touzour kamarad e mem zot nepli res Mahebourg ek ki sa lakaz-la nepli existe, vilaz Mahebourg briye sak zour dan zot leker.